

Ajorsartunik ajugaasunillu oqaluttuaq, qulequtaq manna:

“Allaffissornikkut ingerlatseraatsitsigullu aaqqissuussisimanerput kalaallinik ilinniakkatigut KULTURIKKULLU qaffasisumik piginnaasalinnik sulisoqalernissamut aqqtissiuussisuua, imaluunniit naamik?”

(-aallavigalugu Markus E. Olsen-ip malaatiinnarlugu saqqummiinerata kingorna inuttaata nammieq sukumiinerusunngorlugu isummersummik naqitanngortitsinera.)

Siullermik qujanaq saqqummiinissamut periarfissinneqarama; nalinginaasumimmi sammisanut allanut – soorlu ilinniagara aallavigalugu anersaakkut perorsaariaatsimut tunnganerusunut nammieq aaqqissuussannik saqqummiussaqartarama.

Taamaattumik tuppallernarpoq maannga aggersagaanera piumaffigineqarneralu taamak isumasioqatiginnermut pingaaruteqartigisumut saqqummiusseqqullinga.

Uunga aaqqissuussamut isumassarsiorfiusoq 1970-mi pisoq siuaannit peqataaffigineqareerpoq, angaakka marluk Jørgen CF Olsen Seth Olsenilu, kiisalu akkaararput Inooraq Olsen, imaappoq politikkikkut isummersorneq peqataanerlu ilaqtariit iluanni taqqatsinni tillerpoq uagutsinnilu takornartaanngilaq.

Immikkut pisimasoq qanigisannit oqaluttuarsiarisimasara eqqaarusuppara:

Qanga 1920’kut qiteqqunneranni aatama qatanngutaa Seth Olsen (anaanannit), qajaannarmik Nuummut Landsrådemut ataatsimiigiareerluni ukiakkut oktoberip qaammataata nalaani - silarlummik sumi tamaani unnuisiaqartarluni aqqtini sivisunaarlugu avannamukarpoq; silarlutiitsittarnerminillu angerlamut apuukkami peqqikkunnaarutigalugu sivitsunngitsoq toqqutsigaa. Pisimasoq tamanna uanga nammieq angallatinnik ataatsimeersuarnermut maanga - sarfat maliillu akorngisigut kisima Sisimiuniit avannamukarninni qamuuna anersaakkut nukittorsaatitut eqqarsaatigaara; assaa qanorli taamani qajaannarmik!

Sethep toqunnginnermini qatanngutiminut aatannut Simon Olsenimut qinikkatut pisussaaffini tunniukkamiuk oqarsimavoq: *“Naalagarsuit sukarutaat napiniaraluarakku naffassiinnarunarpara, kinguaariit tullit tamanna qanortoq naammassilissuk”*, imatut paasillugu: Naalagarsuit qulangersimanninnerat allanngortikkumasimagaluaraa - uagut nammieq aquut tigummillugu ingerlatsinissarput angujumallugu; suli maannamut - sooq pinerpa naammassinngisarput!

Taava uunga qulequuttamut tunngatillugu - sooq uagut suli tamakkiisumik ajugaasimannginnersugut - ***ajorsartunik ajugaasunillu*** oqaluttutissavassi:

I)

Nunasiaalereernerup kingorna 1700 naajartortoq siulitta ilaat Appamiut Amerlullu akorngani inuusut - nammieq anersaakkut siulersugaanissarput pillugu mumisitseriarnera iluatsinngitsoorpoq, soormita? Sumik peqquteqarsoraasiuk?

Nunasiaatillit ajoqersuiartortitat siulersortaasa pigaluaramikku pigaluaramikku naamik itigarpaat; taava kiap kikkullu unitsippaat? Kalaaleqatitta! Ajoqersuiartortitanut kiffakulunnguusup naalagarsuarnut maniguuntingaarluni kalaaleqatini unitsippaa!

Pisimasoq tamanna aallarniutigalugu uagut kalaallit kalaaleqativut nammineernerulernissatsinnut aqqutissiuussisut qasseriarlutami unitsippagut nakkarsarlugillu?

Ajorsartut akornganni pakatsinartut pisimasorpassuit allat taajorneqarsinnaagaluartut tamakkernagit taakkulu akornganni uku assersuutigilakka:

II)

Soorlu: 1959-mi angaara Jørgen CF Olsen (Lumumba) nunatta imminut aqunnerulernissaa namminersornerulernissaalu qallunaat aviisitigut saqqummiuteeqqaramiuk qanoq pisoqarpa? Arraa!?! Kalaaleqataasa utoqqatseqquaat – uku naalagarsuit taamak pissanngikkai!?! Taamaattoq aporfissarpassuit aqqutigereerlugit minnerpaamik ataaseq iluatsippaa - tassalu Landsrådep kalaallimit siulittaasoqalernissaa, tamannalu 1967-mi pivoq; 1970-mi ataatsimeersuarnermut aqqutissiuussisuusoq.

III)

Taava Apollooraq Mogensen 1963-mi KNR radioatigut oqalugiarpoq, kingorna oktoberip 24-ni 1963-mi Atuagagdliutini nr. 22-mi saqqummiunneqartoq:

"Danmarkip nunatsinnut ajortulai" aalassaataaqisumik, allaammi aasiit kanngunartutut nunaqqatitsinniillu utoqqatseqquneqarnermik kinguneqartut.

Soormita uagut nammineernerulernissarput sorsuutigineqaleraangat kalaaleqatigiit akornatsinni immitsinnut naalleraatilersartugut?

Naalleraanneq 1979-p kingorna qanormita ippa?

Suna pillugu Hjemmestyre iluatsippa?

Kalaallit tamakkisumik siuttummata? Naamik! Qallunaat ataatsimiititaliami siuttummata aatsaat iluatsippoq! Ataatsimiititaliaq qallunaamik siulittaasoqarpoq – soorunami! Ilaasortallu amerlassusaat eqqaassagaanni kalaallit qallunaallu amerlaqatigimmik avippaat; qanormi aamma kalaallit namminneq nunaminni piissaanerup aqunissaanut amerlanerussuteqassappat? Soorlu ullumi, - maannamut ingerlatseriaatsimut assersunneqarsinnaasumik taamanili hjemmestyremut alloriarnermi danskit tungaannit kikkut piissaaneqarnerunerannik inissiisoqarpoq – soorlu aamma alloriarnerup tulliani - Selvstyredvalgep aappaa qallunaartalik aatsaat pilersinneqarmat Selvstyre iluatsippoq.

Perorsaariaatsimut sangutikkaanni: Ukiut siullit pingasut meeqqamut ima pingaartigaat - ineriatortarnerata sinneranut sunniuteqartussamik pingaarutilimmillu tunngaviliisoqarluni; uanili aqutseriaatsimut tunngatillugu qallunaat imminut pinngitsoorneqarsinnaajunnaareerlutik inissititereerput; taamaammat toqqamavik tunngavillu uatsinnut peqqinnangitsoq qajannartorlu suli maannamut atugarput tunngavigaarput.

Paarisassaavugut?

Kalaallit aqutseqataanerat hjemmestyrep siornatigut 1857-mi siullermik pisimavoq, Paarsisutoqqat aqqutigalugit. Paarsisutoqqalli H.J. Rinkip nalaani pilersinniarneqalermta 1970'kut qiteqqunneranni pisimasumut assersunneqarsinnaavoq; qallunaammi Rink pivaat: Kalaallit? Kalaallit aqutseqataallutik? Suna ilisimagamikku? Kisitsisinnaanngillalluunniit!

Taamaattoq Rinkip nalaani atorfilitat pingasut nunatsinnut uummateqarlutik tunniussimasut naapitassaasimapput (Rinkip saniatigut: Samuel Kleinscmidt, C.E Janssen J.F.T. Lindorff); taakkulu inuit ilinniarsimanermikkut soraarummeernermilu

angusaat pitsaasuusimapput; taamanikkummi manna tikillugu ileqqummat soraarummeernermermi angusarissaanngitsut kisimik nunatsinnut suliartortinneqartarlutik; soorlu maannakkut - pikkorissallattaariarlutik nunaminnut uteqqittarlutik. Agguaqatigiissillugumi tikisitat ukiut marluk missaani nunatsinniittarput.

Imaappoq tikisitat poqiinnerit pikkorunnerillu nunatsinni erngertumik aqutsisunngortarput siulersueqataalersarlutillu - tamanna qinikkatsinnut aqtseriaatsitsinnullu sunniuteqarnerluttarsimassaaq?

Rinkip nalaani atorfilitatt pingasuinnaagaluarlutik nunap inuisa ileqqinut ataqqinnillutik inuaqatigiillu aqutseqataalernissaannik aqqutissiuussisuusimanerat nersugassaavoq imaannaanngitsoo; uagutsinnut uummamnioqarlutik paasinnissinnaasimammata. Ullumikkummita?

Umiarsuaq aqumiullu avataaneersut

Qanga grækerit oqaluttuaatitoqaat Troja aamma uagut nammineq Hjemmestyrerput sutigummita assigiissuteqarpat?

Hjemmestyrep umiarsuaata tикингilaattaani ulappunnersuaqarpoq, annoraalersuulluta, annoraarli "atisarput" naammaginerparput? Naamik.

Hjemmestyrep "umiarsuaa" - soorlu nunatta nammineq aqumiutut ilinniarfiani Skipperskolini pisimasutut ippoq - ilinniarsimasortatuavut aqummiut tamakkiisumik "angallataatitsinni" atunngikkivut; ilinniarsimasut sooq atorfissaanut atunngilavut?

Allaanngilarmi qanga qangarsuaq Grækerit nalaanni Trojami pisimasoq nunatsinni pisoq: Trojap pallittaalisa pigaluaramikku pigaluarmikku pallissinnaannginnamikku angallatistik unnuaqqutsillutik isateriarlugit hestersualiarivaat, hestersuullu iluanut toqqorlutik; Trojarmiullu aqaguani iteramik akeqqatik tammaavaat, taamaallaallu akeraq ataaseq "ussiisussaq" kiserngorussimavoq, unnersiorporlu hestersuaq una tunissutaasoq; akunnerminni uukapaatitaanerlutik assortuussutigerarlugu hestersuaq eqquppaat ajugaanertillu unnuarsuarmut nalliuottorsiutigalugu; aqaguanili aqagutaangaarlutik iteramik pileriallarpaat akeqqaminnit sianinaarneqarlutik uukapaatitaasimallutik, "tikisitat" nunartik aqukkaat – soorlu tassavik nunatsinni pisimasoq – taanna namminersornerulererup umiarsuaa tikisitaannarnik aqumiulik. Taakkulu aqumiunngippata umiarsuaq passunneqarsinnaanngilaq (inatsiserpassuit), uagullu nunatsinni nammineq takornartatut takornarianut ilitsersuisuinnanngorsimavugut (sagsbeandler/guide).

Naalleraannersuaq

Manna tikillugu ataatsimoorfissatsinniit avissaarutissavut ujartornerusarpavut, soorlu erfalasorput atuutsinniarneqalermet partiip dk-mut atajumasup akuerinngilaa, taamaalilluta erfalasorpulluunniit ataatsimoorfiginngilarput.

Oqaatsivut salliutinniarneqalermta nunaqqatitta oqaatsitsinnik ilikkarsimannngitsut ikinnerussuteqalernissartik massuassutigaat, nalligigatsigillu oqaatsivut pilliutigeqqippavut; pissaanerullu oqaasii (dansk) allannguuteqaratik pissaaneqarnertik attatiinnarpaat.

Pissaanerup oqaasii danskisoortut uagut nammineq akueriinnarpavut – immitsinnut pilliutigissalluta pisariinnerutittaratigu (takorlooruk angerlarsimaffimmia appariit, aappaan qallunaajuppat illup iluani qallunaatut ingerlatsisoqassaaq, tamannalu

aqtseriaatsimut tuniluuppoq; naamimmi Sisimiuni pisimasoq malinngilaat: "asagumma piumagummalu oqaatsivut ileqquvullu ataqqikkit!"?).

Allaat namminilivinnissamik tunngaviliinissaq (Maliinannguaq Markussen Inatsisartunut ilaasortaatillugu) kalaallillu pisortassat (Aarluit) 1990-kut qiteqqunneranni ilungersuuteqaleruttormata taamani Namminersornerulererup siuttuata sumiginnarpai assuaralugillu kalaallit pisortaaneq kulturerinngimmassuk uumasutut nujuartatut ulorianartumik ilioqqunagit; arraa! Allaat namminersulivinnissarput uagullu nammieq siuttuunissarput kalaaleqatitta maannamut kinguarsarsimavaat! Allaat siulersuisuutitani aamma isummersuisuni (bestyrelsesposter & tænkertank) qallunaat siuttuujuarsimapput.

Taava Hans Enoksenip siuttuunerata nalaani kalaallit pisortanngortinneqarmata kalaaleqataasa assuaraat – partiimut aalajangersimasumut ilaasortat kisiisa pinerarlugit; kingornali Selvstyre eqqunneqarmat pissaanermillu nikittoqarmat tupinnaannartumik ataatsikkut asserluinnaanik akerlerluinnaanillu pisoqarpooq – oqaatsivut pingarnerpaaniartussat kalaaleqativullu pilliutigeqqillugit aqutsisoqalerpoq; arraa! Assuarisatinngooq malittarpaat!?

Naatsumik: manna tikillugu uagut nammieq aqtseriaatsimi – umiarsuarmiippat allaffissuarmiippalluunniit – tamakkiisumik aqtseqataalersimannginnerput namminerpiaq pisuussutigaarput - allat pisuussutiginngisaat!

Allaammi Ilimmarfittaap aqtseriaasisaani aalajangersagialiornermi Ilisimatusarfiullu kalaallimik pisortaqarnissaanut oqallinneq eqqaaginnarlugu; sooroq kalaaleq pisortaassasoq? Ilisimasagunngooq ilinniarsimanerpullu amigarpus! Arraami...

Uanga nammieq Ilisimatusarfitsinnut isernialerama piumasaqaatit tamakkiisumik naammassisimannginnakk kalaaleqatitta assuaraannga – akerlianilli qallunaap aqutsisuusup akuersaarlunga (pisimasut assigiinngitsut marluk, aappaa arnaq appaalut angut)! Siullermik allaffissornikkut aqtseriaatsimut aappassaanillu Upperisarsiornermut institutsimi.

Sunaana taanna kalaaleqatitsinnik mattussuineq? Soormi kikkut tamarmik ilisimassusermik peqalernissaannik aqqutissiuussigutta – folkeuniversitetimik pilersitsinitigut?
Allaanngilarmi taamani kitaamiut qangarsuaq upperisaq aqutigalugu aqutsileruttoramik biibili oqaatsimik ataasiinnarmik - ilinniarsimasut kisimik paasisinnaasaannik allassimagaat; allaanngilarmi puilasoq ilisimassusermik pilersitsisussaq assersimaneqartoq ilinniarluarsimasutut taajukkatsinnit!

Imminut qiviartariaqalerneq

Kalaallip kalaaleqatiminik assuarinnittarnera, unitsitsisarnera naalleraasarneralu uani piviusunik assersuutini oqaluttuanngortitsinkut qanoq immitsinnut qiviarluta anigorsinnaavarput? Sulimi oqaluttuaq ingerlavooq...

Soormita kalaaleq qaffasissumut inissikkaangami kalaaleqatini sumiginnartarpai? Sooruna kalaaleqatini tunulliullugit ikku danskit pissaanillit pallitalisap iluani sernissugarigai? Sooq kalaaleqativut ullutsinni siuttunngoraangamik pavungarsuaq inornarsereerlutik inissittarpat? Soorlu qarmarsuq akornatsinni pilersillugu? imalt. immitsinnut parnaarulluta – periarfissatsinnik mattussuulluta? Imaannerpa kalaaleq nammieq immini ajornartorsiutaasoq? Allaanngilarmi CD "Kunngiitsuuffik" perullugu "kalaaleq" kisimi imminut uppitissimasoq.

Nunatta siunissaa / Greenland Future Katuami eqqartorneqarmat kikkut qanoq oqaluttut eqqartuisoraasigit? Suullu pingaarnertut eqqartorpaat? Soorunami: qanoq niuernerulernissartik aningaasarsiornikkullu qanoq iluanaarnerulernissartik eqqartorpaat; uagut? Qanoq katsorsagassaatiginerput uteqattaartuartarpalput – soorlu taassuma qitornap ukiuisa siullit pingasut iluanni peqqinnartumik perorsaalluni tunngaviliisimannineq aliortugaralugu; alloriaqqinnissamut ”pinnguarsuavut” kinguarsaatigilerlugit.

Naggasiut

Suna pillugu upperisarsiornermik palassisatullu ilinniagaqarnersunga aperineqaraangama akissutit marluusut akornganni pingajuat nipituumik oqaatigisangnisara imaappoq: Upperisaq ataaseq ataasiinnarmillu niueqateqalernissaq sakkugalugu nunarput tiguagaavoq, sooq taava upperisaq niueriaaserlu ataasiinnaq kipitikkumallugu nunatta inuisa anersaakkut niuernikkullu kiffaanngissuseqalernissaat angusinnaassanngilarput?

Immaqali ajornartorsiutit pilerneranni sakkugineqartut assinganik ajornartorsiutit aaqqinneqarsinnaanngillat? Soormimi ilinniakkavut, ilisimasavut, misilitakkavullu aqtsisut ilagiillu akornganni atorumaneqanngillat? Aperilanga: Suna pillugu anersaakkut niuernikkullu nammineq qinigassaqarumalluta pissarsinerunissarput kiffaanngissuseqarfigissanngilarput?

Tamakkuunerpat nunasiaataasimanerup kinguneranik nunap inuiisa nunasiaateqarsimasut ileqqinut, upperisaannut maniguutiinnarlutik tunniutiinnarsimanerannik imminut qaqtinniarnitsinnut ajorsassutivut?

Taamaammat alloriaqqinnissaq manna tulliusoraara: immitsinnut saammaannissarput; kukkussutit unittoorutigimasavut kukkunersiorunnaarlugit immitsinnut qiviarluta alloriaqqittariaqalerpugut; naallerartivut, ajortulisavut naallerarsimasavullu paasillugit utoqqatserfigitig; assavut misigissutsivullu tullitsinnut parnaarsimatiinnarnagit isaatsigit, kamak parnaarussatut ilutsinittooq iperartigu – pissaanermillu pinnguarnerput kinguarsaatigiinnarnagu - nammineq pissaanerup tamakkiisumik tigunissaanut alloriaqqinnissamut ”naqqaniit” aaqqissusseqatigiitta; ilumut alloriarta!